



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8

Hong Kong aser southern China nung tüzümsüng adoka lir

US Open 2023: Coco Gauff aser Aryna Sabalenka final asayatsü



VOL. XX NO. 328 (ADOK 328)

DIMAPUR

KÜPTOKNÜ (SATURDAY)

RONGJUI (SEPTEMBER) 09, 2023

₹ 5.00

Assam ajungalen nungi AFSPA aser DAA agientsü

Guwahati, September 8, 2023

(Agencies): Chief Minister Himanta Biswa Sarma-i aniba Assam State Cabinet ajanga Assam ajungalen nungi Armed Forces Special Powers Act (AFSPA) aser Disturbed Areas Act agientsü metetdaksüogo.

Guwahati nung aliba State Guest House nung osangbener den jembidang Chief Minister Himanta Biswa Sarma-i Cabinet lemtet indang ashi.

"Centre sorkar dang Assam nung küm aika benoka aliba AFSPA agientsü atema temepishiba ka yoktsü onoki lemtetogo" ta CM Sarma-i ashi.

State Cabinet-isa AFSPA agientsüba dak alia state ajungalen nungi Disturbed Areas Act agientsü Centre dang ashitsü, ta paisa ashi.

Assam Cabinet-isa state nung college aika nem university jenjang agütsüba metetdaksüogo.

State Cabinet-i Sibsagar College, Kokrajhar Government College, Bongaigaon College, JB College-Jorhat, North Lakhimpur College, Nagaon College aser Gurucharan College university jenjang nung ajungkettsü temelaba agütsüogo.

Tanü cabinet senden nungsa September 17 nungi Tamulpur district kübok Biswanath nem 'official district status' agütsüsi lemtet.

September 9 nü Assam Power Distribution Company Limited (APDCL)-i Union Minister HBS den power sector tebilemtsü lemsateptsü atema Assam Cabinet-isa telemtetba agiogo.

PM Modi-i US President Joe Biden den senden amen



Hokolbarnü 7, Lok Kalyan Marg nung Prime Minister Narendra Modi-i US President Joe Biden den senden amenba angur. (X/PMO)

New Delhi, September 8, 2023

(Agencies): Prime Minister Narendra Modi-i Hokolbarnü US President Joe Biden den senden ka menogo.

Honibar nungi New Delhi nung G20 Summit amongtsü jakdang tena senden amen.

"7, Lok Kalyan Marg-i US President Joe Biden jaokba atema pelar. Küna senden junga menogo. Küna onük aika lemsatepogo aser iba ajanga India aser USA tsüingda rongsenketzüng aser nisung tesentaktep akangshitsü. Asen linük ana tsüingda tesentaktep ajanga alima tajungba akümba nung tongtipang shilem agitsü" ta PM Modi-i metetdaksü.

Iba senden nung US Treasury

Secretary Janet Yellen, Secretary of State Anthony Blinken aser US NSA Jake Sullivan nunger aden. India tsütsü nungi External Affairs Minister S Jaishankar aser NSA Ajit Doval na aden.

Taruba anogo ananü tsüingda PM Modi-i linük 15 shi ka den sendentem amentsü sentong lir.

"Item senden ajanga India-i parnok den tesentaktep aliba meyipa repringshitsü maongka angutsü aser terenlok tsütsü amalitep alitsü" ta PM Modi-i ashi.

"New Delhi G20 Summit ajanga human-centric aser inclusive development lenmang tasen ka lapoktsü amanger" ta paisa ashi.

"US President Biden-i

multilateral development banks (MDBs) nung temelenshi bener arutsü atema jembitsü" ta US national security adviser Jake Sullivan-i ashi.

"President Biden-i G20 nung PM Modi lenisüba tenüngsanga jembitsü aser United States-i G20 pusemba nangzükshiba den 2026 küm US nung amongtsü aliba indang jembitsü" ta House press secretary Karine Jean-Pierre-ia ashi.

Taküm June ita Prime Minister Modi-i United States semdangdang Washington DC nung US President Biden den ajurutepa liasü. Idangji Biden-i New Delhi nung amongtsü aliba G20 Summit yongyaba indang shia liasü.

Tanü Kohima nung sorkar office ajak lapoktsü

Kohima, September 8, 2023

(DIPR): 14 buba Nagaland Legislative Assembly indang session tanabuuba agitsü aliba atema Kohima nung September 9, 2023 (2nd Saturday) mapa inyakba anogo asütsü.

Kohima nung aliba

Administrative Heads aser Heads of Departments ajanga pei pei Department nung ketdangsur aser staff ajak office-i arutsüba inyaktsü tetuyuba agütsür ta sorkar sangdong ka nung metetdaksüogo.

Northeast nung tzünglu kanga arutsü

Guwahati, September 8, 2023

(Agencies): Assam, Meghalaya, Arunachal Pradesh, Nagaland, Manipur, Mizoram aser Tripura nung September 11, 2023 tashi tzünglu kanga arutsü.

Assam, Meghalaya, Nagaland, Manipur, Mizoram aser Tripura nung taruba Hombat tashi tzünglu kanga arutsü ta India Meteorological Department (IMD) ajanga ashi.

Külen, Deobar tashi Arunachal Pradesh nung tzünglu kanga arutsü ta IMD-isa ashi.

IMD-i Assam aser Meghalaya atema 'orange alert' aser Nagaland, Manipur, Mizoram, Tripura o Arunachal Pradesh atema 'yellow watch' sangdonga liasü.

Assam nung tüzümsüng tensa tajungba akümba mapang ka nung IMD-i tzünglu arutsü osang metetdaksüogo.

HE dept. nung 'contractual teachers' agientsü nenshir: ANCSU

Dimapur, September 8, 2023

(TYO): All Nagaland College Students' Union (ANCSU)-i Higher Education & Tourism Minister dang contractual teachers 42 mapa nungi anentsütsü nenshia metetdaksüogo.

Higher Education department nung tesayur inyaktsü temsüa maliba nisung 42 lir anungji iba shidi agütsüba sülen anogo 14 tsüingda parnok mapa nungi anentsütsü mapang züngzüktsür ta ANCSU-i Minister dangi shidi ka züluogo.

"Contract nung nisungtem shimoka maparen ya tanü tasen masü saka küm aika inyaka aruba mapa ka lir. Ajisüaka ANCSU-i iba tebilemtsü agientsü atema department aser sorkar nem mapang peria dang agütsüogo" ta President Toito D Chishi aser General Secretary Tenyesinlo Bukh nati shidi nung shia lir.

ANCSU-i iba tebilemtsü

lemsatepaka department-i süoki ia meblem aser mapa kecha meinyak. Onoki inyaktsü junger ta asüba tebilembatem lemsatepogo aser aiben shiditem züluogo, ta tenatisa ashi.

Kümtem süia arudang iba amai contract nung tesayurtem shimokba ajanga temsüa alirtemi open competition maongka manguba dang masü rejutem nunga tesayuba nung tetsükdaksü ajurur. ANCSU-i contractual teachers nüba agütsüba atema pelar saka parnok inyaka moudaktsütsü, ta tenatisa ashi.

Iba shidi agütsüba sülen anogo 14 tsüingda Higher Education department nung Contractual teachers 42 mapa nungi anentsütsü akhangar. Iba dak alia tesüiba nung ashiba ama department-i tesayur meperiba tensa majurudaktsütsü atema inyaktsü nenshir ta ANCSU-isa metetdaksüogo.

Manipur nung nisung 2 tepset; 90 tema yiru

Imphal, September 8, 2023

(Agencies): September 8, 2023 anepdang Manipur nung khatepdang nisung ana asü aser 90 tema yirua lir.

Tengnoupal district kübok Molnoi yimtsüng nung sepaitem aser telungpurtem tsüingda khatep.

Tanep 6:00 ako meta prangpong abener telok kati Molnoi yimtsüng amak ta osang angazüker. Iba osang angashia police telok ka iba tesemi ao.

Idangji sepaitem aser telungpurtem tsüingda khatep aser iba mapang telungpur 4 shi khaseter alitsü akok ta osang kar ajanga ashir.

Telungpurtemi tai maketba yimdaklirtem amakba osang angashir Kakching aser Thoubal nungi nisungtem Pallel tesem nung adenshi. Ajisüaka Pallel nung mapa lemsüka aliba Assam Rifles-i parnok noktang.

Idangji nisung kari Pallel telungi aitsü atema Assam Rifles den raratep aser iba tensa

azüoktsü atema Assam Rifles-i tenük amdaktsüba mokozü amshitsüsa aküm.

Iba lendong nung nisung ana injang agi khaset aser 90 tema yiru. Iba tatalokba atema Kuki aser Meitei nunger kati ka ka aitsüteper.

Meitei nungeri military subotsü agir Pallel amak aser iba jagi yimdaklirtem anameta army camp ka nung oa jenok ta Kuki nungeri ashir.

Iba lendong nung Assam Rifles jawan ka aser Kuki nunger ka asü.

"Military subotsü agiba Meitei nunger trok tepsetba onoki angazükogo. Pallel nung Kuki aser Meitei nunger tsüingda peace agreement ka liasü saka ibaji Meitei nungeri raksaogo" ta Indigenous Tribal Leaders' Forum (ITLF) spokesperson Ginza Vualzong-i ashi.

Ajisüaka, Meitei nungeribo lisopur teloktemi khatetsü tenzük asütsü akok ta ashir.

Parnoki Meitei nunger ki ana

rongdoktsü aser iba ajanga Chin-Kuki nungeri rara tenzükba kuli sayur ta Meitei nungeri ashir.

"Chin-Kuki narco-terrorist groups ajanga tenemlen nungi injang khaloktsü asütsü. Iba ya jelia tasa atonger inyakba ama lir. India nung G20 nung adentsü aruba lennirtem nem angashidaktsütsü atema iba mapa inyak" ta Coordinating Committee on Manipur Integrity (COCOMI) spokesperson Atouba Khuraijam-i ashi.

Bodbarnü Bishnupur district nung nisung meyirjang aika Phougakchao Ikhai nung adenshir army barricades raksatsü merangba sülen tanep iba lendong atalokogo.

"Iba tesem nung tensa mejungi liasü aser iba jagi RAF, Assam Rifles aser Manipur Police-i tenük amdaktsüba mokozü amshia tensa süngjemdaksü" ta ketdangsur kati ashi.

Kohima nung International Clean Air Day mungogo



Kohima, Rongjui/Sept. 09 (TYO): International Clean Air Day benjongmung den Kohima yimti asoshi National Clean Air Programme 2022-2023 kübok nûburtem nem tali tajungba nung angatetdakja shisa lemsatepba sentong Capital Cultural Hall nung September 8, 2023 nü agia liasü.

"Together for Clean Air" omen nung ajemdaker iba sentong ya District Administration Kohima ajanga ZubZub India, Kohima Smart City Development Ltd aser Kohima Municipal Council den lungjemer ayongzüka liasü.

Iba sentong nung tesemdanger tongti ka ama jembidang Deputy Commissioner, Shanavas C, IAS ajanga nûburtem dang yimti nung lipajen müreka aser junga ayutsü asoshi mürekmejua alitsü ayongzüka liasü.

Pai kaketshir dang yimti müreka ayutsü asoshi awareness agütsür ka-ka akumtsü ajungshia liasü.

Er. Kezha Thenuo, CEO,

Kohima Smart City Development Ltd ajanga 'Smart Living' onük nung ajemdaker jembidang, alima nütsünyongsük shilem 99 dak tema mopung tamajung achir aser iba yongji küm shia alima nung nisung million 6.7 asür, ta ashi.

Mopung menenba ya meimchir temang asoshi 'environmental risk' tulutiba lir aser alima nung tasüba aser tashidak balala nungi kumzüktetsüba teblemtsü ka lir, ta pai ashi. Anungji mopung menenba anema tongpang raratsü ya kanga paidoktsü makokba ka kumogo, ta ashi.

National Clean Air Program (NCAP) ya national-level sentong ka lir, koba nung nûbur ajungai shilem agitsü nungdaker aser mopung menenba azioktsü asoshi nûburtem nem training agütsür aser ki o jen yanglur, ta Thenuo-i ashi.

Pai iba sentong nung adener ajak dang khuret angatetba senso tajung ka-ka akumtsü ajungshi aser jana-reja timi

ketdangstüba, tzü aser energy wazüka ayuba nung temolung agütsütsü, yimti tebour junga ayutsü mechi süngdong aser naro tali atemtsü ayongzüka liasü.

Yimti temeket nung timtem majurutsüsa nûburtemi mera agitsüla aser tanur-tain ta melie nûburtemi sentong tajung ayongzüka nung molungsoa shilem agitsüla, ta Thenuo-i ayongzüka.

"Smart Living" tetetzü ya teblemtsü-khuret angateta, temelenshi agizüktetba indang lir, ta pai ashi aser nûbur ajuga dang Kohima Smart City Development Limited ajanga inyakba nung yariteptsü ajungshia liasü.

Iba sentong nung school 22 nungi shilem agia liasü aser Riizhiikhrie Government High School, Bayavii Higher Secondary School, aser GMS Midland ya best-performing school sangdoga liasü. Maneni tatishitsü tajung sayuba sempet North Field School nem agüja liasü.

Kohima nung Immunization atema Inter-Departmental senden amen

Dimapur, Rongjui/Sept. 09 (TYO): Jila aser yimdakyimtsüng nungi densema Kohima District Task Force for Immunization ajanga September 6, 2023 nü Intensified Mission Indradhanush (IMI), MR Elimination Drive, aser Routine Immunization (RI) atema Inter-Departmental senden ka Deputy Commissioner, Kohima indang Conference Hall nung mena liasü.

Iba senden nung WHO nungi Dr. Shiela, Senior Medical Officer (SMO) ajanga April nungi August 2023 tsüngta Routine Immunization (RI) indang coverage data analysis osang agütsü.

Taruba RI session ya September 11, 2023 nü tenzüksü, ta lai ashi.

Dr. Sheila-i dropouts, leftouts, Adverse Effects Following Immunization (AEFI) aser RI indang osang shidak sangdongtsü memolungba indang teblemtsütem lemsatepa liasü.

Iba mozü agiba ajanga tajangzük anguba osang sangdongtsü asoshi Auxiliary Nurse Midwives (ANMs) teinyaktsü, tashidak balala nungi kumzüka, taruba immunization atema list tem aser record shidak bendena ayutsü indang lai jembia liasü.

Dr. Khrievilhou Nakhro, District Program Officer

(DPO) for Reproductive and Child Health (RCH) and Universal Immunization Program (UIP) ajanga tang tagidak IMI 5.0 aser MR Elimination Campaign indang osang agüja liasü.

Item sentong indang mezüng round nung Kohima District kübok jila aser yimtsüngtem densema ward 22 nung tesem 15 awajemogo.

Dr. Nakhro-i ashiba agi, IMI 5.0 ya dropouts aser leftouts purtem asoshi lir aser second round ya September 2023 hopta tanabuba nung tenzüksü aser iba mapang akok tashi nûbur ajunga awajemtsü merangtsü.

Pai lokti tentet balala dang IMI indang osang shidak prokshia takok angutsü asoshi ajungshia liasü.

United Nations Development Programme (UNDP) tenüng nung Imli Longkumer-i U-WIN app amshiba aser routine immunization nung iba app amshiyim indang rasaa ashi.

"MOMENTUM Routine Immunization, Transformation & Equity" omen kübok iba senden amendang IRSN/JSI ajanga Vaccinators aser Community Mobilizer pezüi dangar dang alaka inyakba asoshi kulizüng kakat den sempet agüja liasü.

Iba sempet ya Razouvonu (Asha, Kezoma), Kikruseü (Asha, Thizama), Podolu (Lady Health Visitor,

Viswema), aser Kilangtula (ANM, Naga Bazaar Sub-Centre) nungertemi agizüka liasü.

Additional Deputy Commissioner, Kohima, Rhosietho Nguori, NCS ajanga senden tembanga jembidang Ashas, ANMs aser Anganwadi Workers tem ya chichiba temerangertem lir ta tenüngsang agütsü.

Pai sempet angurtem den tepela lemsatep aser maneni bendanga agütsü inyaktsü ajungshia liasü. Nguori-i maneni amalitep akatsü nangzük aser sendaktepa aliba department ajunga dang tashi angatetpa immunization takok angutsü asoshi nungdakba nung yariteptsü ayongzüka liasü.

Mkg nungbingana seret nung senpak 50 latetstür Mokochung, Rongjui/Sep. 09 (TYO): Mokochung Municipal Council tekübok ajak nung tang aliba jenjang bingana (tomato) seret nung senpak 70/- (per Kg) aliba senapk 50/- latetstür, iba nung manitakertem temerenshi alitsü, ta Mokochung ADC & MMC Administrator, Chumlamo Humtsoe-i ozüng küma sangdongogo.

Tuensang DPDB senden menogo

Dimapur, Rongjui/Sept. 09 (TYO): Tuensang District Planning and Development Board (DPDB) senden September 8, 2023 nü Deputy Commissioner, Tuensang indang Conference Hall nung mena liasü.

Iba senden ya Deputy Commissioner aser Vice Chairman, DPDB Tuensang, Lithrongla Tongpi Rutsa lenisüba kübok mena liasü.

Iba senden tenzüka taoba ita senden nung lemtetba lepa reprangshia liasü. Iba sülen Assembly Constituency pezü atema, talisa 2023 küm asoshi Local Area Development Program (LADP) Schemes atema verification committee ka tentetstü indang jembia liasü.

Maneni senden nung

menden ajanga Department of Africulture aser sendaktepa aliba kongsangtem dang taküim meyi mapang alo aser ki o jen raksatsüba jangjatsü aser timtem ajurua aliba tesemtem geotag asütsü asüngdanga liasü. Iba maparen ya timtem ajurua alirtem nem nungdakba teyari agütsütsü asoshi lir.

Board ajanga Eastern United Society, Tuensang; Living Hope Welfare Society, Tuensang; Integrated Development Society, Tuensang; Rural Development Welfare Society, Tuensang; Tribal Development Society, Tuensang; Yangti Yangdei Society, Tuensang aser Nyenshen Football Club, Tuensang registration agütsütsü temaba

ketdangstürtem dangi yok.

CMHSS Impur nung International Literacy Day amung



CMHSS Impur nung September 8 nü International Literacy Day sentong agiba mapang tanur telok kati action song tetoktepba nung shilem agidang tangokba noksa nung angur.

Mokokchung, Rongjui/Sept. 08 (TYO): Clark Memorial Higher Secondary School (CMHSS) Impur nung September 8 nü International Literacy Day mungogo.

Iba anogo nungtem nung takum küm asoshi alima ajungai amshitsü renemba omen "Promoting literacy for a world in transition: Building the foundation for sustainable and peaceful societies" nung ajemdaker CMHSS nunga

kaketshirtem telok balala lemsar action song, contemporary dance, spell bee, folk dance, short play nungertem nung tetoktepba agi aser item nungjagi tajungertem shimteta tetushi senpet agüja liasü.

Kaketshirtem telok balalai omen nung rangloker shilem agiba mapang nung kati ka ajungshitep aser tatem nung süngo jema pelatepa iba sentong kanga dang takokma nung agiogo.



Mokokchung town kübok Tongdentsüyong ward nûburtemi pei akokba rongsen aser nûbu tenlateper Sept 8, 2023 nungi tenzüka Tongdentsüyong ward - Alongmen ward approach lenmang yangluba mapang tangokba noksa nung angur. Mokokchung town kübok ward balala nung ibala mesüka joko sorkar dak meimlai nûburtemi tenla balala tsükteper gari lenmang, tzüpu aser tetsüng lenmangtem yangluba aika lir. Mokokchung, 9th September, 2023.



September 08, 2023 nü New Delhi nung aliba Palam Airforce Airport nung Union Minister of State for Railways, Coal & Mines, Danve Raosaheb Dadarao-i Comoros Tir aser African Union (AU) nung mendenbuba, Azali Assoumani agizükba sülen tangokba noksa nung angur.

INDIA teloktepi assembly by election menden 7 nungi menden 4 angu

New Delhi, Rongjui/ September 08 (Agencies): Tawa state trok nung assembly menden tenet atema by election agiba osang Hokolbarnü sangdongogo.

Opposition INDIA teloktepi menden 4 nung takok angu aser BJP-i aniba NDA-i menden 3 nung takok angu. BJP-i menden asem nung takok angu aser tanüingba menden pezüji Congress, Samajwadi Party, JMM aser TMC-i angu.

BJP-i Bageshwar assembly menden (Uttarakhand) aser Tripura kübok Dhanpur aser Boxanagar assembly menden nung takok angu, ajisüaka West Bengal kübok Dhupguri assembly menden nungbo Trinamool Congress (TMC) matsüngdang BJP-i tamakok

Samajwadi Party-i Ghosi Assembly menden nung takok angu. Iba menden nung BJP nungi candidate ji Dara Singh Chauhan liasü.

Opposition INDIA teloktepi Jharkhand nung Dumri assembly menden aser Uttar Pradesh kübok Ghosi assembly menden na nung takok angu.

SP lenir, Akhilesh Yatra-i, "Iba ya teyagluba politics atema takok aser teraksatsüba politics atema tamakok lir. India-i INDIA takok lenmang nung jajadar," ta metetdaksü.

Tawa Opposition party 28-i sangküm Lok Sabha election nung BJP anema longjemmer tokteptsü atema INDIA teloktepi tentetba sülen tang

mezüing tetendangba nung menden tenet nungi menden pezü nung takok angur.

Kerala nung opposition Congress-UDF-i Puthuppally Assembly constituency nung takok angu. September 5 nü agiba Puthuppally Assembly by election nung Congress candidate, Chandy Oommen-i LDF candidate Jaick C Thomas madak takok angu.

West Bengal Chief Minister aser TMC tongti lenir Mamata Banerjee-i, "By election nung BJP tamakok ngudaksür ajak nem ni tenüingsang agütsür. September 5 nü agiba by election nung BJP-i menden tenet nungi menden pezü nung tamakok nguogo. Iba ya INDIA teloktepi atema takok tuluka lir," ta metetdaksü.

Sorkari 2023-24 küm SHGS nungi tetsür lakh 75 yaritsü lemtetogo

New Delhi, September 08 Agencies): Centre sorkari self help groups (SHGs) nungi tetsür lakh 75 "lakhpati didis" kümdaktsütsü atema Deendayal Antyodaya Yojana-National Rural Livelihood Mission (DAY-NRLM) kübok yaritsü telemetba agiogo.

2023-24 financial year nung sorkari tetsür shiai küm ka nung sen lakh kakaboksa aazükettsü atema yaritsü. Taruba küm asem tsüngda tetsür crore 2 bo "lakhpati didis" kümdaktsütsü nükjiong nung sorkari yimtsüngtem nung tetsürtem nungita yaritsü.

Tang India nung tetsür crore 10 jungnüa SHGs nung densema lir.

Taküm Independence Day anogomong sentong nung jembidang Ato kilonser, Narendra Modi-i, "Nai kodang yimtsüng ka semdangdir nai 'Bank-wali didi', 'Anganwadi didi' aser 'Dawaiwali (medicine) didi' ajurutsü. Asen yimtsüngtem nung tetsür crore 2 bo 'lakhpati didis' kümdaktsütsüji kü nükjiong lir," ta metetdakja liasü.

Ministry of rural development kübok DAY-NRLM-i Bodhbarnü sentong ka ayongzüka iba nükjiong ataloktsü atema jembia liasü.

Iba nükjiong ataloktsü atema asalentong document ka sayadang Rural development & Panchayati Raj minister, Giriraj

Singh-i par ministry kübok ketdangsertem dang December ita tashi nungbo state balalai inyaktetbatem asadangang, ta tuyuogo.

Iba mission kübok SHGs nung tetsürtem nem tashi agütsütsü, tetsürtem longjemdaktsütsü, tetsür federations tashi itdaktsütsü, taküm alitsü atema sen aazütsü asoshi tetsürtem nem shisatsü aser skill training agütsütsü aser senotsü teyari agütsütsü, ta paisa metetdaksü.

National Rural Livelihood Mission (NRLM) data ajanga ashiba agi, tang tashi nung SHGs lakh 87. 4 nung tetsür crore 9.5 lir.



New Delhi nung G20 senden amentsü anogo ka jelia September 08, 2023 nü New Delhi nung Tibetan Youth Congress züngsemtemi China anema longkak aitba noksa nung angur.

NÜKLAI ARURA NI...



Asür Temjenpokba Pongen
09.09.2022 - 09.09.2023

Lanuwa ajioker den kichem
Timtem agi sünger liasü
Putu tom nung tempang
Yarinüaka meyarishi pilaogo
Tiar den merakteptet
Saka asangsang ama longrar-a ni...hi...

Temeim Kinungtsü.

MOLUNGNEN O



Asoba anogo
16/10/1970

Tasüba anogo
31/08/2023

Temeim Ojala aser kinungtsü **Mrs. T. Amongla Longchar**, alima nungi pilar onok molung rongjener saka kodakli ajangzükogo ta tamang agi onok temulung anisüngzükö. La shirangba anogo nungi tasüba anogo tashi nung lokti tentet balala aser kija kibong shirnokisa nübu, rongsen aser sarasadem ajanga yaritepogo nenok ajak dang kanga pelar. Nenok mapa tajung asoshi Tsüngremi moajangma.

Yohan 16:22 - "Tang nenok tejashi kar, saka ni nenok tanaben angutsü aser nenok temulung tepela agi asüngtsü aser nenok tepelaji shingai nenok nungi rakzüka bener maotsü".

~Temeim kinungbo (Mr. Daniel Imti), jala aser kinüngerterem.

TETUSHI AGÜTSÜR



Wb. Limaküzmük aser Wt. Imtinenla na jabaso **Sb.Nungshimongba**-i Nagaland Public Service Commission tatidang nung Junior Divisional Accountant (Class-III Non - Gazetted) under Treasuries & Accounts Department jenjang ajangzüköteta, Merang Kin, Longsa nem konang bener arutsüba asoshi tenüingsang aser tetushi agütsür.

Teyanglur Tsüngremi maneni pa wadang ajak nung moajangma.

Kin tenüing nung,

Wb. Yashitoba Tatar Wb. Alemsuba Tatar Wb.Temsukaba G.B

Office of the AOLI LONGCHAR MUNG DANG

H.Q: Mokokchung, Nagaland

Dated: 08/09/23

SANGDONGER

Lipok nungi Longchar tebou tenüngtem Chungliyimti matongdang kechi naroküm tenüngtemsa ja-a aser amshia aru aser tanga tejadak lir, item tenüngji shinga kidong tenüing rakzüka amshiba masü. Anungji tarutsü nunga Longchar ajaki pei tebou naroküm aser tenüngtem meratai ajatsü 30th August 2023 Aoli Longchar Inti Mungdang Tsünger kilang sendena nenshia renema ayur.

Sd/-
Wb. Dr. Imkongwapang
Tir

Sd/-
Wb. Aren Longchar
Tezülor



TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGJUI09, 2023

Linük ka, Election ka

Narendra Modii aniba BJP teloki jangraba kaji linük nung akokba tashi sobaliba aser inyakyim ka dang süner. Ibayongji, Linük ka, temzüng ozüng ka aser Linük ka, election ka ta asüba tangatetba nung temzüng ozüng latettsü meranger. Linük ka, temzüng ka ta asübaji shitak amai, kechiyong kasa linük nung alirtem rongnung kodaser state, kin kidong aser tamangba yimsü shia temzüng ozüng balala asütsü ? Kasaji, kasa linük nung alir kasa senso purtem rongnung kodaser sobaliba aser tamangba yimsü balala asütsü ? Itemji khen bilemetsübo shitak amai angatettsü, ajisüaka India yabo tanga linüktem ama masü linük kübok linük tilaka aika aliba lima ka lir. Aji oda, alinüka ajier majijem aser nütsünga zünger mezüngma, tangar linüktem den apiteptsüla masü, state shia oshi aser sobaliba balala, yamaji tamangba yimsüa balala, iba jagi India temzüng yanglurtemi India yabo tanga linük amai masü saka alima ka amai bilema, India kübok aliba state ajak nung kin kidong, sobaliba, oshi aser tamangba yimsü, tulu tila ajak züngoka temzüng yangluba angur. Aji oda, tang amshiba India temzüng ya temzüng ka dangbo masü saka temzüng ka nung temzüng aika keta yangluba linük temzüng ka lir. Iba jagiang, Nagaland-a India temzüng nung temzüng balaka arla 371 A agüja lir. Iba amaji tanga state-tem nema temzüngbo India temzüng saka arla balala nung temzüng balala latetja angutsü. Ano, tawa tashi Jammu & Kashmir-bo temzüng kenyongi balaka liasü, saka tangbo agiena lir. Itemji kodang bilemdangdir, India telongjem meraksai küm 75 tashi arubaji India temzüng yanglurtemi linük nung senso ajak sadoksadoka 'nia India senso tajung ka' ta nümadanga bilema alitsüsa yanglua toktsüba ajanga lir tang angateter. Ibaji kodang angatetdir, India nung anogo shia temzüng yanglurtem tushi manentsü. India telongjem meraksanüra, temzüng yanglurtem dak aliba tangatetbaji tanüa India nunger yimten telok ajak senmang kümer kin kidong aser tamangba yimsü kecha mebendangi kasasa India nunger ta nümadanga bilemdaktsütsüsa inyaktsübaji yimten telok shia nükjidong asütsüla. Ano, India asoshi junger amai saka timtem aser mepetmesü tulu ajurutsüba onük kaji, tang BJP teloki Linük ka, Election ka asütsüla ta jembiba ya asütsü. Linük ka, Election ka tetezü Linük ka dang, anungji election paiben ya magii parliamentary aser state assembly election ajak ya linük ajunga nung külemi dang anogo ka nung agitsü tebilemba lir. Atangji, bilemdangra state shia nung election agi manener, kechiyong küm ka assembly election agitsü aser ano küm anasemka tsüngda Lok sabha atema parliamentary election agitsü ta election agi manenba ajanga yimtena rongsen aser nübo endoker aser nübortem rongnunga meputep tali adener, anungji parliamentary aser assembly election anaprongla khen nung temdokang tajungba ta bilemetsü. Ajisüaka, iba tebilembaji temzüng ozüng kümer kodang inyaka odir, tebenja aika adoktsü, kechiyong, tatishitsü agi, yimten telok katia government bener moutet Lok sabha mali akümtsüsa aküm nung koda asütsü ? Election külemi agitsü asoshi state ajak nung state assembly-tema anendaktsütsü na ? Mesüra state-tem election agitsüba mapang ataa Lok sabha mali atatsü ? Idangji, linük nung timtem madoklima ? Ano, külen state ka nung yimten telok katia government bener moutet ser küm ka ta majung dang assembly mali kümadokra, state nung government mali küm asem pezü lok sabha election den külemi agitsü atema atatsü asü ? Aji oda, BJP teloki bener aruba tebilembatem ya khen bilemetsübo junger amato saka itemji kodang jungjunga mapa küma inyaka aotsüba indang bilemdangdir, India benjatsü aser lemsatsü atemabo Linük ka, Temzüng ka aser Linük ka, Election ka ta asüba sentongtem ya asütsü.

OLEMSABANG

Mapa Tajung Asoshi Pelar Tenüngsang Agütsür

S. Nuken Longkumer, Naga United

Ans: Süitema oadokba mapangji koda temenungratsü yamaji Aokin nungi tashitemeteter aika Govt. mapa nung meranga inyaker anisüngzüka pei kidang ajem ajema mena alir dangi osang tajung kar bentsür arutsür!! Aika taküm mali! Saka anünga aliba purtem Tsüngremi arishia toktsürtem koda temoatsü olura? Na nü menden nung akümketa mener yimsü asuba tesüiba mapang koda temenungratsüka lir!!! Tanaben meyiba majurutsü saka nü mapa tajung alimai mamateter. Chief Minister, Chief Secretary/Director nungi peon tashi alua küsa tashi bener liyonga süitema yok!! Item rongnung süngjang tanang aika aküm !! karbo taku tasen tangteta liasü? Kechiba nenoki nüpur tem aika yariogo tenzükgogo tenla aika agutsüba aru!! saka alima aser nüpurtemi temulung machi aser tejashi ajak nenok nem benloktsüogo!! Saka nenoki aremzüka aser alima khuret tulu bener jajayonga tempangogo? Item khuret tulu obendang alimai nenok sempa tenükmerem aser samatsütsü merang saka aremzüka? Ochi nung yimsü asutsü kanga meranga aru, saka tatidang aika ajuruadok ? Temeim mapa aika inyaktsüogo, saka nüngsen jembiba tali akum!! Yamaji Govt. mapa nung khuret abendang ajangshiogo na ?? belemba ama nupur ajak bo mepenladaktsütet, sasasete belem!! Govt. mapa nung takok angur tanü tashi anisungzüka alirtem Tsüngremi alima aser nüpurtem asoshi arishia talang moajang ta sarasademtsütsü!!

Q:- Alima nung nupurtem timtem nalala ajurur ajangshir!! Tia aser tensa balala ajurudang nüktzü ayimba tejashi khuret nung jaja dang aiben taküm samatsü metsubur, yamaji alima ajunga nung kibong Million aikati ajuriudaki ?? Ni kü taküm nung tesüngmangtsü temoatsü anguba aser lenmang sayuba kodanga mamar!! Aika liasü saka, Shri Bendangkokba (IAS) Rtd. Mopungchuket, Shri, I. Yanger, Dipuya Chief Eng. Irri Dept., Shri, I. Alemtemshi Jamir, Longsa IAS, parnok teti bilemtetdaktsür!! Taoba mapang nenok temeim mapa tajung leper tashi abentsü ? Tanü mapangtemji yamaji takar aser tulurtemi mapa tajung inyaktetsü lemapang aika lir! Saka PM Modi asüyonga Indian nunger ajakbo meyaritetsü ?? Tokoto nisungbo kodanga nüngtuogo makümer ? Ni teti otsütem bushir, kaketter azünger anungji rongjena malir. Laishiba ji taküm tembar, jü den jembiba kaketer asem lir. Shri. JN Aeir Yachang (Biography) Dr. & Rev. Imo Aeir Longjang (Biography) Rev. Bendangmeren Longkum, Nüktzü Pongdang ? Yamaji nenokia bushiteter alitsü!!

Alima otsü tembo zünger mezüngma asen tejaklen angutsü? Anungji Tsüngrem O taküm aser kodanga iba taküm O memelenshitsü ? Meimchirtem sama-a oadoktsü saka nü mapa tajung otzübo tete alitsü ? Alima nung tepur tajung yimti aika lir, jangratemtsü aika lir, saka tia maka iba yimli mayangrutet, jangratemtsü mapang majuru, arem min nung rongjenseta arem süngjang aser sungoliotem bendena kipong mesüba tia nung süitema ao ?? Tanaben ajuruteptsü kaketer azünger ? Tatem nung nai Tsüngrem O tsubuang mesura alima tetsubutsü tulu lir ?

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Aor Ordained minister mensem ayongzüker

Dimapur temeküt nung alir Ordained minister mensem ka September 22, (hokolbar) 2023, 9 baji nungi tenzüka Dimapur Ao Baptist Arogo nung amentsü ayongzüker. Tongtibangsa Iba mensem nungji: Aor tia, Khristanem rishikangshiba, Nagaland Dry, Nagalima Khrista asoshi, kasa atsüapong kibakijemba, asen kidanger Manipur tensa, iba den nungdak balala lemsateptsü ajaki bilemdanger arutsü mepishir.

Anungji asenok ajak anema lia iba anogo nungji asen lima asoshi Tsüngrem dang shisatsü aser leniba meshia shisa lemsateptsü sarasadema ayongzüker.

**Kibuba nung,
Rev. Dr. Kari Longchar**

China linük nung Khristan nütsüng marener: Pew Research

September 08, 2023: Tesüiba küm 10 tsüngda China nung Khristan nütsüng arenba kuli tejangja mali, ta Pew Research Center-i metetdaksü.

Tesüiba küm ter tsüngda China nung Khristan nütsüng kanga renlokogo ta jembir, ajisüaka Pew Research Center ajangabo, China nung Khristan nütsüng renlokogo ta ashitsüsa kuli tejangja mali, ta metetdaksü.

Pew Center report 'Measuring Religion in China' ajanga China nung shisaliok telok balala aser sorkar data den külemi linüki ketdangstüba yimsü dak sendakba associations indang survey balala asadanga liasü.

China nung tamangba yimsü balala jenjang bushisüngdangstüji kanga tasak, aser ibaji China sorkari osangtsüsang nokdangba aser bendanger organizations nem survey magidaksüba ajanga lir. Iba dak alia oshi-open balala asüba ajanga lir, ta ashi.

China nungeri yimsü dang 'zongjiao' ta ajar aser Chinese Communist Party (CCP)-i yimsü pongu dang recognize süa lir. Yimsü ponguji - Buddhism, Taoism, Protestantism, Catholicism aser Islam lir, ta Pew Research-i metetdaksü.

2018 küm Chinese General

Social Survey nung shilem agir shilem 10-i, parnok tamangba yimsü telok balala nung dena lir ta ashi, ajisüaka 2021 küm nungbo shilem 7 dang aküm.

Iba survey ajanga bushitetba agi, alima nung yimsü amanger tajemtiba aliba linükji China lir, ta bushitet. China nunger tain shilem 3-i dang parnok atema yimsüji kanga tongtibang ta ashi, aser ibaji kasa survey agiba linük 56 rongnung shilem tajemtiba lir, ta Pew-i metetdaksü.

Osangbenertem aser sorkar statistics kar ajangabo, tang China nung yimsü amangertem kanga renlokdar, aser 2050 küm tashi nungbo China nung Khristan nütsüng teimba asütsü, ta metetdaksü.

Ajisüaka tesüiba küm 10 tashi China nung survey balala agiba ajanga China nung yimsü amangertem mesüra 'zongjiao affiliation' renlokba kuli mangur.

Ajisüaka Pew report ajanga, "Ashiko, China nunger tain aika Khristan asütsüa akok, saka survey agidang mimshir asütsü. Tatishitsü agi, Khristan nütsüng renlokdar asütsüa akok, ajisüaka China sorkari Khristanem inyaksangshiba ajak nung tenük yokba agi survey nung shilem agirtemi pei yimsü sangdongtsü arendaker asütsüa akok," ta metetdaksü.

Alima nung yimsü dak sendakba tenokdangba aika aliba linüktem rongnung China densema lir aser alima nung Khristanem alitsü linük tamajungtiba 50 rongnung China ya jenjang 16buba nung lir (Open Doors 2023 World Watch list).

China nung pei sasa Khristan, ta sangdonger tain shilem 2 (million 20) shi lir aser iba nungjagi shilem 90 shi Protestant Khristanem lir.

Pai sasa Khristan, ta mesangdonyonga 'Yisu dak amanger' ta langzür shilem 7 shi lir, ta 2018 küm Chinese survey ka ajanga bushiteta liasü.

Tang China nung Muslim nunger nütsüng million 17 shi lir. China nung Khristanem dang masü saka Uyghur Muslim nungertema reshikangshir, ibaji ajanga Islam yimsü amangertem nütsüng züngdangtsü kanga tasak.

2013 küm nungi tenzüka item survey aika Xinjiang province nungbo magi; iba province nung Uyghur Muslim nunger nütsüng aika lir.

US nung aliba Duke Divinity School nung World Christianity professor, Xi Lian-i, item osangtem ajanga 1980s nungi Khristan nütsüng arenba anenadokba kuli sayur, ta metetdaksü.

ANOGO ABEN TSÜNGREM DEN

Tetsübu temoatsütem

T. Ken 128:1-6

Tanü asenoki Kibuba tsübuba jembiba kangabo mangashir. Teti Kibubaji kotak tembar ka, shibai menürema asenok den jajar tembar ka ama bilemer. Saka tekong ka nung ashir, "shibaisa Kibuba Tsüngken tsübur, pa temoatsü".

Kibuba tsüngken tsübuba tetezü kechi? Iba tetezü süngmanga akhüm tsübu agütsüba. Iba tetezü asenoki pa matitanger. Pa den masayar. Pai meinyaktsü aliba, inyadaksütsü asenoki memeranger. Israel nungeri Kibuba akhüm metsübu. Parnoki Pa atitang. Parnoki pa ozüng den asaya aser parnok alima den koda anasatepa alitsü merang. Anungji Tsüngremi parnok azüoktsüsa aküm.

Kodang asenoki atangji Tsüngrem tsübudir Pai lemang asem nung asenok moatsür. Mezüngbuba, Pai asenok jajaba nung moatsür. "Nisung shiai Pa lemang nung jajar, pa temoatsü" (t.1). Iba tetezü asenok mapa aser asenok jakla Temeshi.

Tanabuba, Tsüngremi asenok mapa nung moatsür. "Kechiyong ne ket agi züsentetba nai achitsü. Na tepela alitsü, aser ne den junga alitsü" (t.2). Karbo pei mapa nung mepelai lir. Saka asenoki Tsüngrem dang tashi angaa lira kechi mapa südir süang pelaseta inyaktsü. Kodang asenoki Kibuba tsübudir, asenoki pela shishia mapai aotsü aser pelaa alitsü.

Tasembuba, Tsüngremi asenok kibong moatsür. "Ne kidang kilung nung ne kinüngtsüji tejang atangba chinilashi dong ama alitsü. Ne chirnurtem, ne langbang meketa olive süngdong ama alitsü" (t.3). Iba tetezü ajak kibong ka akatsüla-kibong akümtsü, kiyi aotsü ta masü, kijaji kibong tulu ka ama liang. Iba tetezü kibong na temoatsü ka asütsü. "Ajiang, Kibuba tsüngken tsübuba nisungji yamaji alitsü"(t.4).

Kibuba tsüngken metsübu kodanga teli. Paji ne Tsüngrem lir, saka nai pa dang süngmangtsü aser akhümstübuttsü pa dak langa lir. Pa tsübuang. Pa lemangtem nung jajaang aser pa temoatsütem agizükang.

Indonesia nung Swiss nunger missionary, Waser Ernst Anton süogo

Waser Ernst Anton



September 08, 2023: Tesüiba küm 40 dak tema Indonesia nung shisaliok aser loktiliba terenlok atema inyaker Swiss nunger missionary ka asüba atema Indonesia nunger Khristanem mangyimdar, ta osang ka ajanga metetdaksü.

Society of Divine Word (SVD) nung züngsem, Waser

Ernst Anton September 7, 2023 nü Khristan nütsüng teimba aliba East Nusa Tenggara province kübok Wangkung nung asü.

Arrshi küm 94 missionary Waser tepokpok nung timtem liasü aser August 21 nü hospital-i anir oa yariba sülen hopta ka tejaklen kidangi aotsü

inyakba mapang nung pai St. Klaus Kuwu Junior & High School tenzüka liasü. Pai talisa tetsürtem shisaliok atema rangloker inyak, kechiyong iba mapang nungji Arogoi teburtem shisaliok atema dang temelung agüja liasü.

2002 küm nunga pai Werang, West Manggarai Regency nung

mela liasü.

Khristanem social media ajanga pa asüba atema mangyim j a s h i lemsatepogo.

Khristan putir Waser 1977 küm Indonesia-i aruba sülen pa Flores Island nung ali.

1983 küm Ruteng Diocese kübok Arogo ka nung pa

school ka tenzüka aser 2004 küm school anapronglaji Ruteng diocese ket nung agütsü. Item school ji pa nungtem nung tentetba Ernesto Foundation kübok liasü aser 2020 küm tashi pa board züngsem liasü.

1990s mapang nung Indonesia nung rongsenketzüng dak sendakba timtem tulu aliba mapang nung pai nüburtem atema gari lenmangtem yanglutsüba den külemi tzü tajemtsü pipelines ajanga tzü agütsü.

Ruteng diocese-i sangdong ka ajanga, "Pai Tenla kitem aser school building aika sütsüba den külemi nüburtem nem pipe ajanga tzü agütsü," ta metetdaksü.

Tamalen pai sayuba kaketshir ka, Ansensius Guntur-i, pai shisaliok agütsüba atema pelar, ta metetdaksü. Guntur ya tanga Philippines nung missionary inyaker.

Osangbener den jembidang

Guntur-i, "Ozü tsüraburtemi school fees magütsütetba agi ni school züngtur toktsütsü liasü saka pai (Waser) ni high school mezüngma tashi school fees agütsütsü nangzük. Pai meyari asübo ni tang iba jenjang nung ya melila," ta metetdaksü.

St. Klaus Kuwu Senior High School nung principal aser putir, Valerianus Paulinus Jempau-i, "Pa (Waser) dak Khrista aliba ajanga ni ajungmesoa ni Kangki apur Pa (Khrista) sülen anidaksü lemtet," ta ashi. "Putir Waser-i Europe aser par kibong toktsür arua Manggarai nung shisaliok tamendakdak yanglutsü," ta paisa metetdaksü.

"Pa shi nung süadokyonga pa tanelaji teti ozü school melungjang nung lir, yamaji Ruteng Arogo nung züngsemtem melungjang nung lir," ta paisa shisem.

Missionary Waser den tatembangbuba asüpila sentong September 10 nü agütsü.

**AO OSHI ANGAZÜKDAK:
TANÜ ANGAZÜKTSÜBA OJANG**



Saki

(v) asaa inyak, metetsümonga ashioktsü (deliberate act of deception)

* Taintemi tanubusang arem nung saki toktsür adok.

Sakli

(adj) tezü atsüba, jashia sayuba (irritable character)

Takola sakli aitdang shinga dena o mejembir.

OLONG PAITEP # 6630

1		2			3					4
							5			
6										
					7	8				
				9		10				
			11							
12									13	14
			15		16					
						17				
18										
									19	

TIPIEN

- 1. Mapang aben
- 5. Jenti
- 6. Yariteper / Temedanger
- 7. P _ _ _
- 10. Taküm jakla tajung
- 11. Nguyutep
- 12. Temadok
- 15. Nütsü tedi
- 17. Tajangzük maka
- 18. Ozü apuba oset
- 19. Inyaktet

LANGTSÜNGLEN

- 1. Seret aika
- 2. Kanga putep
- 3. Tashitak telong
- 4. Tatsük o temokong tsüngda
- 5. Mangyimba mapang
- 8. Meshiyonga ao
- 9. Ajunga
- 11. Liasü
- 12. Tai apu
- 13. Ozü akatsü amshiba
- 14. Tamakok masü
- 16. Yangi masü

OLONG PAITEP # 6629 TELANGZÜBA



TIPIEN:

- 1. Kasa, 6. Rangben, 7. Mait,
- 9. Poktet, 11. Ati, 13. Atasa,
- 16. Rür, 17. Rajang, 20. Lanu,
- 24. Nüngjem, 25. Süra.

LANGTSÜNGLEN:

- 1. Khu, 2. Sükak, 3. Onük, 4. Oba,
- 5. Anü, 6. Ratet, 7. Mozü, 8. Ita,
- 10. Tar, 12. Tinu, 14. Salem,
- 15. Aja, 18. Anünü, 19. Taju,
- 21. Ano, 22. Onü, 23. Kua.

NAI-A YA METETTER MA



Tang tashi nung film ka kija nungi dang Academy award teimtiba ngutetba film asem lir. Film asemprong jagi Academy award terkaka (11) ngutetogo: Itemji yamai lir:

- (1) Ben-Hur (1959)
- (2) Titanic (1997)
- (3) The Lord of the Rings : The Return of the King (2003)

I ba ongko ya inyakdangang

+ + = 36

+ + = 28

- = 3

= ? = ? = ?

**CENTRAL BUREAU OF COMMUNICATION
MINISTRY OF INFORMATION & BROADCASTING
GOVERNMENT OF INDIA**

**Central Bureau of Communication kübok Private Registered Troupes
aser Individual Artistes registration/ empanelment atema metetdaksür.**

Central Bureau of Communication (CBC)-i Manipur, Mizoram, Nagaland, Assam, Sikkim, Tripura, Odisha, Maharashtra, Goa, Dadar & Nagar Haveli UT. Kerala, Lakshadweep Island, Himachal Pradesh, Jammu & Kashmir UT & Ladakh UT, Andra Pradesh aser NCT of Delhi State nungi Drama, Nukkad Natak, Dance-Drama, Composite Programmes, Folk and Traditional Recitals, Magic, Mythological Recitals, Puppetries amala Private Registered Troupes aser Individual Artistes küm asem atema Zonal/Regional Offices, Trivandrum, Bhubaneswar, Guwahati, Imphal, Pune, Chandigarh, Jammu, Vijayawada aser New Delhi (HQ) kübok registration/ empanelment asütsü jaoker.

Tanga application format aser eligibility conditions osangtem metettsü atema Central Bureau of Communication website: www.davp.nic.in mesüra www.cbcindia.gov.in nung reprangang.

Application agütsütsü tatembang anogoji **October 10, 2023** alisü.

www.davp.nic.in mesüra www.cbcindia.gov.in nung addendum/ corrigendum metetdaksütsü.



**Joint Director (Programme)
Central Bureau of Communication.
New Delhi (HQ)**

CBC 22204/11/0001/2324

**Tripura nung
mezüngbuba Muslim
BJP MLA adokogo**

Agartala, September 8, 2023
(Agencies): Tripura by-election nung Bharatiya Janata Party (BJP) candidate kati takok ngua pa mezüngbuba Muslim MLA kümogo.

Boxanagar nungi BJP candidate Tafajjal Hossai-i by-election nung takok ngua MLA kümogo. Taoba general assembly election nung pa tamakok ngua liasü.

Tesüiba mapang Boxanagar Assembly Constituency nung CPIM-i dang takok ngua aru saka tan by-election nung BJP candidate Tafajjal Hossain-i votes 34,146 agi takok angu. CPI(M) candidate Mizan Hossan-i vote 3,909 dang nguteta liasü.

"CPI(M)-i parnoki liberals ama sayur saka parnok tangatetba khenyongi balaka. Parnoki votes angutsü atema minority onüktem jembir. Boxanagar Assembly nung minority pur nem kecha magütsü aser parnoki terenlok kecha mangu" ta BJP state general secretary Amit Rakshit-i ashi.

"CPIM-i minority pur ajembanga ayu saka BJP aruba sülen Boxanagar renloktsü tenzük. Tesüiba küm 35 nung mengudangba terenlok angu aser iba jagi Tafajjal Hossain-i takok tulu nguogo" ta Rakshit-isa ashi.

"2023 Assembly election nung ni takok angutsüba liasü saka telok kati Boxanagar, constituency nung voters tem ratadaksü. Tang nisungtemi ibaji angatet aser BJP nem votes enoktsü" ta Tafajjal Hossain-isa ashi.

"Iba ya tesüiba küm 25 tashi CPIM ajanga inyaksaa aruba meyiptsüba lir. Tarutsü anogotem Tripura nungi CPIM samadoktsü. Boxanagar nung vote enoktsürtem CPIM atsüngdoka otsü tasen ka yangluogo" ta Hossain-isa metetdaksü.



**Office of the
LION'S CLUB LONGSA
TENÜNGSANG AGÜTSÜR**

Wb. Limakümsük aser Wt. Imtinenla na jabaso **Sb. Nungshimongba**-i NPSC tatidang nung Junior Divisional Accountant under Treasuries & Accounts Department nung takok tulu ngua asen Club nem tenüngsang bener arutsü nung konang tetushi agütsür.

Asen teyanglur Tsüngremi ne wadang tali moajangma ta asen Lion's Club sarasadem.

**Sd/-
Nungsangtemshi
President**



**Sd/-
Temsutoshi
Secretary**



**Office of the
MONGSENYIMTI SENSO MUNG DANG
B.P.O MONGSENYIMTI P.O CHUCHUYIMLANG
DIST: MOKOKCHUNG NAGALAND-798614**

KHONANG TETOSHI YIMYIM

Mongsenyimti Sensotsür rongnungi tedangshi, ajemalu shisashir Kr. Asenla Jamir. (Wb. R. Nungsang Jamir aser Wt. T. Apokla Ozüküm) na jala ajanga dang NPSC ajanga tatidang agiba nung Block Development Officer (BDO) jenjang ajangzüketa Mongsenyimti Sensosanger ajak nem khonang tulu bentsür aruba tepela tetushi Mongsenyimti Sensomungdang ajanga lemsateper.

Tsüngremi maneni nü sempet aser nü shita-awadang nung temoatsü, azükaru aser temaba takok lidakjang ta Sensomungdang aser Sarasadem.

**Sd/-
(WB. IMOTONG)
President
MSM**

**Sd/-
(WB. OBANGONEN)
Secretary
MSM**

**Bajali ochimashi ken o nung Assam police 2 apu
Guwahati, September 8,**

(Agencies): Bajali ochimashi ken o dak sendakba nung Assam police ana ano puogo. Tena ya Samsing Engleng aser Laksh Adhikari na jangjaogo.

Samsing Engleng ya Doboka nung Laksh Adhikari ya Hojai nung apu. Tena apuba züngsema Bajali ochimashi ken o nung nisung 11 puogo.

Iba ken o dak sendakba nung Bajali SP Sidhartha Buragohain, ASP Gayatri Sonowal and her husband Bobby Singh Sharma, DSP Puskal Gogoi, SI Anup Jyoti Patgiri, SI Debojit Giri, ASI Sasanka Das, ABC Injamul

Hassan aser driver ana- Deepjoy Roy o Nabir Ahmed nunger pua lir. Rabiul Islam ta ser kozü shishilembar kati FIR benokba sülen Bajali ochimashi ken o bushisüngdangtsü tenzüka liasü.

Police ketdangsürtemi tiyazü ken o ka pa dak tai tongloktsü aser süpokrem sen crore aika meshi ta Rabiul Islam-i ashir.

Tai tonglokja aliba police ketdangsürtemi pa dang Rs 5 crore meshi aser magütsüra tiyazü ken o ka nung pa aputsü amokmeren Islam-isa shia lir.

Iba ken o ya Assam police criminal investigation department (CID) ajanga bushisüngdang.

North Korea nung 'nuclear attack submarine' ka sayaogo

Seoul, Rongjui/Sept. 09 (Agencies): North Korea-i nuclear weapons amshitetba submarine mezüngbuba sayaba sentong nung lenir Kim Jong Un shilem agia liasü.

State media ajanga ashiba agi, iba submarine yagi linük indang nuclear tashi tali ulushir.

Iba submarine nem nüngja Hero Kim Kun Ok agütsüogo, koba North Korean naval officer aser tejen ka tenüing alitsü.

North Korea-i mapang talangka nungi nok-nü balala yanglunüba rongnung nuclear submarine densema liasü.

North Korean state media KCNA ajanga noksa kar prokshiba nung Kim ya rongnendak nokdaka liasü aser pa müketa naval officers tem liasü aser submarine tuluka liasü.

Iba submarine ya navy indang 'underwater offensive' tongtipang asütsü ta pai ashi.

"Nuclear attack submarine ya küm aika asen linük asoshi kanga nüngdaka aru, aser tangbo asen tsükchir molungjang nung tetsübo ka aitdaksür," ta pai ashi.

Ajisüaka iba submarine ya tashi kodakar mejangjai lir.

Teshisadanger temi ibai Soviet-era Romeo-class submarine ka südi ta amanger, koba 2019 küm Kim-i semdanga liasü saka nuclear weapons amshitsüsa yanglur alitsü akok.

"Yangji tetsükdaksü aser timtem karbo alitsü südi," ta International Institute for Strategic Studies nung researcher Joseph Dempsey-i ashi.

Iba submarine ya ola tulu, tenüshi aser meta kanga talangbo masütsü südi, ta taoba mapang US government weapon expert Vann Van Diepen-i ashi.

Iba submarine ya tejen masü ta miimshitsü mechi noksa nung stern aser propellers tem junga mesayur, ta Dempsey-i ashi.

Iba submarine ya amshitetsü asü masüar mejangja. Iba yagi nuclear aliba missiles takok ngua khaloktsütetsü ta North Korea-i ano mesayu.

Iba submarine ya shorter-range submarine-launched cruise missiles (SLCM) abentsüsa yanglu ta amanger, koba agi regional targets tem nung khaloktsütetsü.

South Korea-i iba submarine sayaba ya aitsü aser North-i tali buraloka jembir alitsü ta ashir.

Japan-ia anisüngzük maliba lemsatepogo. Chief Cabinet Secretary Hirokazu Matsuno-i ashiba agi, North Korea mitkar inyaksangshi nung lendong tulu lir aser asen linük security tsütsü taoba mapang dang nungi tang lendong tuluba lir.

North Korea-i taküma maneni ballistic aser cruise missiles tendanga arur aser 2022 nunga kanga sashia tendanga liasü.

North Korea linük kumteter küm 75 ajungtsü lia iba submarine ya alima dang sayur. Iba benjongmung nung shilem agitsü China nungi ketdangsurtem yoktsü ta ashir.

Tan ita Tir Vladimir Putin ajurutsü asoshi Kim ya Russia-i aotsü sentong lir ta osang angazükba mapang ka nung iba ya ataloker.

North Korea-i iba mapang Moscow dang advanced weapons technology meshitsü akok, ta alimai bilemer.

Hong Kong aser southern China nung tzümetsüng adoka lir

Hong Kong, Rongjui/Sept. 09 (Agencies): Hong Kong aser southern China nung aliba yimtitem nung tzünglu kanga sashia aruba sülen tzümetsüng adoka nüburtem timtemteper.

Hokulbarnü Hong Kong nung yimtong aser subway station tem tzü agi metsüngbanger liasü aser ketdangsur temi school aser mapa inyakba tesemtem shibang.

Tzüngsang-mopung takzüba bureau ajanga ashiba agi, Brehostibarnü nungi tenzüka tzünglu ya küm 140 jungnüa nung tesashitiba lir.

Nisung 100 dak tema mozü kidangi anir ogo aser nisung aika kumzüka maparen inyaka liasü, ta emergency services ajanga ashir.

Brehostibar aonung Hong Kong yimti nung tangokba noksa tem nung tzünglu kanga sashia aruba ayanga yimtongtem ayong tulu ama kumer liasü, shopping centre aser public transport tzü agi mubanger liasü.

Social media nung video prokshiba nung nüburtem gari tekolak aser ali nungi ajungketa alidak liasü, aser tesem kar nungbo tzü ya metre aika metsünga subway entrance tem shibang.

Hong Kong indang cross harbor tunnel, koba asetkong tuluba aser north tsütsü Kowloon peninsula sendakteper, iba tunnel y tzü agi mubanga liasü. Tzünglu yagi Hong Kong nung tenem alilen anentsüh alua highway kar anenbang.

(Maneni tapak 8 nung...)

GOVERNMENT OF NAGALAND

DIRECTORATE OF HEALTH & FAMILY WELFARE

NAGALAND : KOHIMA

No.DHFW-5-23/TRG-NSG/2022/4101-103

Dated, Kohima the 8th Sept' 2023

Declaration of result for GNM written Examination 2023 - 2024

Sl. No.	ROLL NO.														
1	138	31	422	61	1110	91	232	121	1378	151	50	181	1374	211	179
2	1332	32	716	62	945	92	999	122	1519	152	1164	182	1118	212	74
3	901	33	874	63	617	93	872	123	1283	153	413	183	657	213	810
4	135	34	626	64	576	94	718	124	986	154	292	184	849	214	57
5	103	35	107	65	332	95	643	125	511	155	1023	185	149	215	284
6	375	36	387	66	1019	96	825	126	1494	156	1039	186	1596	216	1105
7	4	37	467	67	912	97	327	127	817	157	1329	187	380	217	539
8	49	38	1120	68	762	98	808	128	16	158	1094	188	1418	218	1254
9	789	39	781	69	783	99	472	129	735	159	992	189	1398	219	1590
10	1361	40	1597	70	153	100	1385	130	854	160	996	190	433	220	394
11	308	41	839	71	98	101	1004	131	1106	161	1216	191	893	221	151
12	96	42	638	72	317	102	242	132	494	162	339	192	1452	222	1381
13	782	43	892	73	587	103	93	133	728	163	1235	193	799	223	577
14	1073	44	88	74	307	104	939	134	393	164	1481	194	1335	224	1150
15	388	45	1416	75	312	105	1049	135	1156	165	1203	195	152	225	196
16	286	46	216	76	1136	106	669	136	1242	166	1455	196	698	226	61
17	47	47	692	77	1021	107	220	137	426	167	1438	197	147	227	465
18	444	48	291	78	164	108	1524	138	55	168	190	198	695	228	1580
19	1570	49	366	79	1139	109	1067	139	1330	169	1259	199	958	229	985
20	1509	50	162	80	676	110	416	140	1323	170	271	200	183	230	331
21	263	51	1162	81	1350	111	976	141	1586	171	1198	201	189	231	948
22	115	52	929	82	362	112	1454	142	282	172	534	202	448		
23	618	53	134	83	1195	113	219	143	1536	173	1292	203	180		
24	844	54	823	84	432	114	1107	144	156	174	1117	204	1338		
25	455	55	280	85	1155	115	673	145	192	175	1140	205	1601		
26	1221	56	547	86	628	116	821	146	660	176	581	206	1585		
27	1583	57	1355	87	1197	117	369	147	652	177	1342	207	768		
28	437	58	1207	88	145	118	1362	148	186	178	116	208	1352		
29	54	59	792	89	542	119	160	149	647	179	310	209	1304		
30	796	60	504	90	294	120	476	150	445	180	296	210	1599		

- *NOTE :
- Viva voce will be held on 15th September and 16th September 2023.
 - 15th September 2023: Sl. No. 1 to 180
 - 16th September 2023: Sl. No. 181 to 231
 - Venue for Viva Voce: Directorate of Health & Family Welfare, Kohima.
 - Time for Viva:-10:00 AM.
 - Candidates are directed to bring the Admit card and other original documents for verification.
 - Lobbying will result in disqualification.

(DR.RITU THURR)
Principal Director
Directorate of Health & Family Welfare
Nagaland, Kohima.

No.DHFW-5-23/TRG-NSG/2022/4098-4100

Dated, Kohima the 8th Sept' 2023

Declaration of result for FHW/ANM written Examination 2023 - 2024

SL. NO.	ROLL NO.										
1	445	21	13	41	6	61	479	81	189	101	104
2	419	22	303	42	391	62	372	82	82	102	276
3	495	23	119	43	369	63	92	83	545	103	134
4	16	24	94	44	89	64	500	84	111		
5	114	25	328	45	522	65	334	85	158		
6	366	26	297	46	211	66	498	86	133		
7	300	27	147	47	157	67	473	87	365		
8	178	28	118	48	512	68	173	88	388		
9	413	29	481	49	93	69	90	89	326		
10	528	30	33	50	414	70	175	90	270		
11	19	31	85	51	436	71	29	91	79		
12	27	32	284	52	236	72	293	92	131		
13	401	33	385	53	424	73	529	93	154		
14	34	34	53	54	135	74	371	94	31		
15	129	35	285	55	177	75	291	95	353		
16	446	36	17	56	49	76	273	96	339		
17	367	37	130	57	88	77	146	97	116		
18	390	38	420	58	57	78	423	98	346		
19	387	39	228	59	37	79	206	99	194		
20	470	40	106	60	28	80	309	100	78		

- *NOTE :
- Viva voce will be held on 16th September 2023.
 - 16th September 2023 : Sl. No. 1 to 103
 - Venue for Viva Voce: Directorate of Health & Family Welfare, Kohima.
 - Time for Viva:-10:00 AM.
 - Candidates are directed to bring the Admit card and other original documents for verification.
 - Lobbying will result in disqualification.

(DR.RITU THURR)
Principal Director
Directorate of Health & Family Welfare
Nagaland, Kohima.

Zunheboto nung 10th Inter-Departmental Tournament tenzükogo



Dimapur, Rongjui/Sept. 09 (TYO): DSCZ Indoor Stadium, Zunheboto nung 10th Inter-Departmental Tournament sentong September 7, 2023 nü tenzükogo, kong tesemdang tongti ama Advisor, Land Resources, G. Ikuto Zhimomi dena liasü.

Iba saisapong sentong ya District Sports Council, Zunheboto ajanga ayongzük aser September 9, 2023 nü tembangsü.

Advisor G. Ikuto-i sentong nung jembidang, sorkar mapa inyakerem asendenshitsu aser tashi itshitsu asoshi iba amala asayamung ya nungdaker, kechiaser employees tem aiben pei mapa nung dang sodaka alir, ta ashi.

Pai shilem agir ajak dang takok angutsü atema kisung masü saka saisaponger tanüla

amshitsu ayongzük, koba ajanga pei yimya dangar dang sayur, ta ashi.

Takok angutsü ya tongtipang lir, saka tesendaktep tajung yanglutsü nükjidong mezüng südaktsüsüla, ta pai ashi.

Advisor-i shilem agirtem dang südoksünema, asendenshitsu aser mapa tajungba nung inyaktetsü asoshi iba maongka tajungtiba nung amshitsu aser pei aliba jila terenlok nung shilem agitsü asoshi tesendaktep tajung yangertsü aser nüburtem lenla balala nung temaba jenjangi ajungkettsü ayongzüküa liasü.

Iba sentong tenzüküa Kughavi V. Chishi, Pastor, NCRC ajanga sarasadem, Deputy Commissioner, Zunheboto, Rahul Bhanudas Mali, IAS ajanga tarur pela agizükba o jembi.

Maneni ANPSA (Z) ajanga temeja ken ka aten, DSCZ züngsem Vikaho Zhimomi-i asayatem tenangzüktepba agia liasü aser Advisor-i iba asayamung tenzüktsüba sangdonga liasü.

Iba asayamung nung department balala tsungta badminton (tarep aser kija) aser carrom (tarep) nung tokteper.

10 buba Zunheboto Inter-Departmental Tournament nung department balala nungi badminton tarep asoshi nisung 27, badminton kija asoshi nisung 25, carrom tarep asoshi team 34-i shilem agir.

Maneni Nagaland Under-11 aser Nagaland Under 13 (Nagaland State Champions 2023) tsungta exhibition match ka asayaba nung Nagaland Under-13 ajanga straight-set nung takok ngua liasü.

SAFF U-16 Championship nung India final tongogo

Thimphu, Rongjui/Sept. 09 (Agencies): Hokulbarnü Thimphu, Bhutan nung aliba Changlimithang Stadium nung SAFF U-16 Championship semi-final nung India-i 8-0 agi Maldives madak takok nguogo.

Iba asaya nung India nunger Mohammad Arbash aser Aiborlang Kharthangmaw, Vishal Yadav, Mohammed Kaif, Levis Zangminlun, aser Manbhakupar Malngiang nunger temi goal ka-ka agüja liasü.

Asaya tiyong tashinung India-i goal ana agütsür liasü aser tanabuba half-time tenzükba sülen goal trok agütsü.

India-i asaya tetenzükdang nungi amokbanger asayatet aser Bharat aser Levis nati goa agütsüsü merang saka tezülani ao.

Mezüng goal agütsüsü maongka ya abelen nungi Samson Ahongshanbam-i cross agütsüba ya liasü, saka Bharat-i tongloksüba goal post tezülani ao.

Right winger Vishal Yadav ya timba central nung asaya aser Maldives fullback Ahmed Mikyal Muyeen ya pa sülen asemzüsüsa akum aser Levis asoshi maongka sadema liasü.

Asaya tenzüküer minute 21 buba nung Karish Soram-i ball azükleni yokdang Yadav mashilen nungi asema arua Maldives defence mangmangdaksü aser pai defender ana alema bener oa goal ya agütsü.

Iba sülen Bharat-i metsüba ball ya Maldives keeper Ahmed Mifzal-i nokdanga liasü.

Ajisüaka minute 36 buba nung Mate Ngamgouhou-i corner metsüba Kaif-i aibelen mesüi yoka liasü.

Half-time sülen Maldives asoshi tia memelenshi aser India temolungtetba tali tuluba nung asaya liasü. Yaipharemba Chingkhani abelen nungi pass ka Levis dangi yok aser pai iba goal idaktsü.

Iba sülen India head coach Ishfaq Ahmed-i asayar aika melena Bharat, Mate aser Yadav melen Manbhakupar, Yoihenba Meitei, aser Aiborlang nunger asayadaksü. Aser Aiborlang aser Manbhakupar nati minute 62 buba aser 70 buba nung goal ka-ka yok.

India goalkeeper Suraj Singh nem anisüngzük agüja Rohit nem maongka agüja tatemlen asayadaksü.

Ano Mogammad Arbash-i

goal ana aser Aiborlang nati goal ana-na agüja India-i 8-0 agi iba asaya ayong ayonga akok.

India ya Pakistan aser Bangladesh tsungta semifinal tanabuba nung takok anur den final asayatsü, koba Deobar nikongdang 5:30 ako nungi tenzüktsü.

Hong Kong aser southern China...

(Tapak 7 nungi...)

Hokulbar nikongdang tzunglu aruba tera ajemer liasü aser ketdangsür temi tzunglu ya 'black' warning nungi 'amber' alert kuma ajemtsü. Ajisüaka Honibarnü tashi tzunglu arutsü shia lir.

Brehostibarnü ketdangsür temi 'black warning' sangdonga liasü, kechiaser tzunglu ya ghonda ka nung 70mm dak tali arua liasü. Nikongdang Hong Kong Observatory ajanga tzunglu ya ghonda ka nung 158.1 millimetres tashi arua liasü ta ashi, koba 1884 kum nungi record bendena aruba nung tematiba alitsü.

Hong Kong asetkong Kowloon aser yimti north-east tsütsü nikongdang 6:00 ako nungi ayatirm tsungta tzunglu ya 200mm dak tema arua liasü.

China south tsütsüa tzunglu ya kanga sashia arua liasü, talisa

US Open 2023: Coco Gauff aser Aryna Sabalenka final asayatsü

New York, Rongjui/Sept. 09 (Agencies): America tsür Coco Gauff-i semi-final nung Karolina Muchova madak takok ngua US Open tetsür kija teniss asayba final la asoshi mezüngbuba tongtetogo.

Arishi kum 19 tain Gauff-i Muchova madak 6-4, 7-5 agi takok angu aser Honibarnü final nung second seed Aryna Sabalenka den asayatsü.

Longkak aiter nisung peziü fossil fuels amshiba anendang ta ayimtenba ajanga Gauff-Muchova asaya minute 49 shi anena atatsüsa akum.

final nung tanaben asayar alitsü, shiba 2022 French Open nunga Poland tsür Iga Swiatek den asaya saka tamakok ajurua liasü.

"Points kar angudang ola tulu liasü, aser kü tenarong raksatsü ama bilem. Imlibilema ola tulu adokang. Ni iba asayamung repranga tain akum, ni balaka amai bilemer. Saka mapa ano matem," ta Gauff-i asaya temi sensaksemba mapang ashi.

2019 kum Gauff arishi kum 15 alidang la sempet ngua taratsü nung teimla aliba asayar ka ta nüburtemi züngshia aru.



Tebur ka Arthur Ashe Stadium nung atem nung tetsüng menaloka yua liasü aser nisung kari longkak aiter ya meindokang ta asaloktsü.

Security temi nisung asem anir ao saka pezübuba anir aotsü mapang talangba agia liasü. United States Tennis Association ajanga par pezüprong New York Police Department ket nung lir ta shiogo.

Iba longkak aiter ya tennis court nung dang liasü aser semi-final tanabuba nung Australian Open champion Sabalenka-i kanga meranga asayar Madison Keys madak 0-6 7-6 (7-1) 7-6 (10-5) agi takok ngua New York nung America tsür dang asayatsü aliba nungi jenbudaktsü.

Seed trok buba nung alila Gauff asoshi Grand Slam singles

La takum March ita arishi kum 19 ajung aser 1999 kum Serena Williams sülenbo pei linük Grand Slam final tongteter America tsür tanutsütilaji la lir.

Czech tsür Muchova ya major singles final tanaben tongtettsü nükjidong nung asaya liasü, shiba takum French Open final nung Swiatek-i tsükdaktsü.

Alimai Gauff dak rangloker alidang Sabalenka ya ola madoki tajungba nung asaya arutagi.

Arishi kum 25 tain Sabalenka ya iba asayamung sülen world number one akumtsü, aser la last four tashi asayayonga atudang set kata dangar nem mokokdaksü lir.

Sabalenka-i taoba mapang Grand Slam semi-final trokben asayaba nung khen dang takok nguteta lir.

Hong Kong den arütsü anasa Shenzhen nung tzülu ya 1952 nungi record bendena aruba nung tesashitiba liasü.

Guangdong province nung tayimtsü aika thinen, aser yangji aliba ketdangsür temi lenden nung alirtem dang tenem leni aotsü ajungshia liasü.

China south tsütsü tükum anasa nisung million aika alir.

Brehostibar aonung Shenzhen-i Hong Kong nem osang agütsür reservoirs nung aliba tzü yoka liasü aser ibaji ajanga Hong Kong nung tüzümetsüng tali adokdaksü südi ta nüburtemi shia liasü.

Ajisüaka Hong Kong indang security chief Chris Tang-i Hokulbarnü ashiba agi, yimti

nung tüzümetsüng adokba ya Shenzhen reservoirs nungi tzü yokba ajanga masü aser iba inyakyim ya Shenzhen aser Hong Kong asoshi timtem kecha meliasü.

China indang meteorological administration ajanga linük southwestern region nung Hokulbarnü aser Honibarnü tzunglu maneni kanga sashia arutsü imlar, ta shiogo.

Typhoon ana, Saola aser Haikui agi southern China nung kongshir hopta ka majungdang tzunglu tesashi ya arua liasü.

Tzüksang-mopung melenba ajanga yipru tesashiba kumdaktsür aser ajungben tüzümetsüng adoka teraksa tuluba bener arutsür.

BILEMDANGANG

"Azümesener asoshi teti tatemtsü lir."